

Na osnovu člana 39. Ustava Hercegovačko-neretvanskog kantona („Službene novine HNK“, broj: 2/98, 4/00, 7/04 i 6/21), Skupština Hercegovačko-neretvanskog kantona, na sjednici održanoj dana _____2025. godine donosi

ZAKON O SLATKOVODNOM RIBARSTVU HERCEGOVAČKO-NERETVANSKOG KANTONA

I - OSNOVNE ODREDBE

Član 1.

- (1) Ovim zakonom uređuje se slatkovodno ribarstvo: ribolovne vode, ribolov, akvakultura, zaštita riba, ribarsko-čuvarska služba, nadzor nad provođenjem zakona, kaznene odredbe i druga pitanja koja su od značaja za oblast slatkovodnog ribarstva u Hercegovačko-neretvanskom kantonu (u daljnjem tekstu: HNK).
- (2) Ribe u ribolovnim vodama koriste se na održiv način koji doprinosi očuvanju biološke raznolikosti ekoloških sistema.
- (3) Ribe se u ribolovnim vodama mogu loviti i uzgajati pod uslovima propisanim ovim zakonom i drugim propisima donesenim na osnovu njega.

Član 2.

- (1) U ovom zakonu u upotrebi su pojmovi sa sljedećim značenjem:
 - a) akvakultura je privredna djelatnost uzgoja riba i drugih vodenih organizama u smislu reprodukcije i hranjenja u ribnjacima, kavezima, ogradama ili lagunama;
 - b) godišnji plan je akt potreban za provođenje ribarske osnove tokom kalendarske godine;
 - c) lovostaj je vrijeme u kojem se pojedine vrste riba, osim riba iz akvakulture, ne mogu loviti i stavljati u promet;
 - d) poribljavanje je plansko unošenje riba u ribolovne vode na osnovu ribarske osnove i godišnjeg plana;
 - e) privredni ribolov je izlov riba na ribolovnom području radi stavljanja u promet i sticanja dohotka;
 - f) ribolovne vode su kopnene vode, a obuhvataju rijeke, potoke, prirodna i umjetna jezera, bare, kanale i druge vode u kojima žive ribe;
 - g) slatkovodno ribarstvo je uzgoj, lov i zaštita riba u ribolovnim vodama, ribnjacima, ograđenim dijelovima ribolovnih voda i kavezima, kao i promet i korištenje ulovljenih riba;
 - h) ribnjaci, ograđeni dijelovi ribolovne vode i kavezi jesu uređeni prostori na poljoprivrednom ili drugom zemljištu ili ribolovnoj vodi namijenjeni za uzgoj riba, riblje mlađi i oplodene ikre, koji ispunjavaju propisane uslove i ne smatraju se ribolovnom vodom u smislu ovog zakona;
 - i) ribolovno područje je dio ribolovne vode koje čini hidrološku, biološku i ekonomsku cjelinu, a u okviru granica HNK;

- j) ribolovna zona je dio ribolovnog područja na kojem se ostvaruje ribolovno pravo, a koja je određena administrativnim granicama jedinice lokalne samouprave unutar HNK;
- k) riblji fond u ribolovnim vodama je fond riba ribolovnog područja, a služi kao osnov za razvijanje i provođenje sportsko-rekreativnog ribolova;
- l) ribolov je lov riba uz upotrebu ribolovnog pribora i opreme, a može biti privredni ribolov ili sportsko- rekreativnog ribolov;
- m) ribarska osnova je stručna studija o načinu privređivanja ribolovnom zonom kao dijelom ribolovnog područja, a odnosi se na obavljanje sportsko- rekreativnog ribolova;
- n) ribič je lice koje lovi ribu uz upotrebu dopuštenog ribolovnog pribora, opreme i mamaca radi rekreacije i sporta;
- o) ribolovni pribor je sredstvo kojim se obavlja ribolov;
- p) ribolovna udruženja i njihovi savezi jesu udruženja građana osnovani radi sportsko-rekreativnog ribolova, natjecanja, odgoja i obrazovanja sportsko- rekreativnog ribolovaca;
- q) ribolovno pravo je osnovni akt kojim se korisnicima dijela ribolovnog područja-ribolovne zone omogućava obavljanje sportsko- rekreativnog ribolova u određenoj ribolovnoj zoni, u kojem su propisane sve mjere za provođenje zaštite riba na toj ribolovnoj zoni;
- r) sportsko-rekreativni ribolov je lov riba udicom na dijelu ribolovnog područja-ribolovnoj zoni radi razonode i rekreacije, kao i sportske aktivnosti;
- s) ulov jesu ulovljeni primjerci riba u sportsko - rekreativnom ribolovu ;
- t) zaštita je skup mjera koje se poduzimaju radi očuvanja i obezbjeđenja uslova za dugoročno i održivo korištenje riba.

II – RIBOLOVNE VODE

Član 3.

Ribolovne vode su sve kopnene vode, osim voda:

- a) u posebno zaštićenim dijelovima prirode proglašenim na osnovu posebnog zakona;
- b) u ribnjacima;
- c) u akumulacijama, jezerima ili tekućim vodama iz kojih se zahvata voda za piće za koju su na osnovu posebnog zakona donesene odluke o zaštiti izvorišta;
- d) u akumulacijama, jezerima ili tekućim vodama koje su rezervisane za javnu vodoopskrbu.

Član 4.

- (1) Ribolovno područje je dio ribolovne vode koje čini hidrološku, biološku i ekonomsku cjelinu u okviru granica HNK (u daljnjem tekstu : "HNK").
- (2) Na području HNK utvrđuje se jedno ribolovno područje "HERCEGOVAČKO-NERETVANSKO".
- (3) Ribolovna zona je dio ribolovnog područja na kojem se ostvaruje ribolovno pravo za sportsko- rekreativni ribolov.
- (4) Granice dijelova ribolovnog područja-ribolovnih zona unutar ribolovnog područja "HERCEGOVAČKO-NERETVANSKO" određene su administrativnim granicama jedinica lokalne samouprave.

- (5) Granica između ribolovnih zona na tekućoj ribolovnoj vodi određuje se upravno na maticu toka od obale do obale, odnosno do glavnih odbrambenih nasipa.

Član 5.

Dijelove ribolovnog područja-ribolovne zone, određuje i ustupa na korištenje fizičkom i pravnom licu, odnosno udruženju sportskih ribolovaca (u daljnjem tekstu: korisnik) kantonalno ministarstvo poljoprivrede, šumarstva i vodoprivrede (u daljnjem tekstu: kantonalno ministarstvo) uz prethodno pribavljeno mišljenje nadležnog organa jedinice lokalne samouprave, na čijem teritoriju se nalazi dio ribolovnog područja- ribolovna zona (u daljnjem tekstu: ribolovna zona).

Član 6.

- (1) Ribolovne zone, kantonalno ministarstvo, uz prethodno pribavljeno mišljenje nadležnog organa jedinice lokalne samouprave, ustupa na korištenje korisniku davanjem ribolovnog prava putem konkursa, uz naknadu i na osnovu predloženog programa gospodarenja ribolovnom zonom.
- (2) Vlada HNK utvrđuje visinu naknade za ribolovne zone iz člana 4. ovog Zakona, a na prijedlog nadležnog organa jedinica lokalne samouprave za određenu ribolovnu zonu.
- (3) Naknada za ustupanje na korištenje ribolovnog prava su namjenska sredstva koja se uplaćuju u Budžet HNK i dijele u omjeru 50% kantonu, a 50% lokalnoj samoupravi na čijem području je ribolovna zona.

Član 7.

- (1) Kantonalno ministarstvo s korisnikom zaključuje ugovor o ustupanju ribolovne zone koja sadrži: naziv ribolovne zone, utvrđene granice ribolovne zone, mjere zaštite ribljeg fonda, način upotrebe ribolovne zone i uslove raskidanja ugovora.
- (2) Korisnik kome je ribolovna zona ustupljena na korištenje ne može to ribolovno pravo ustupati drugim pravnim ili fizičkim licima.

Član 8.

- (1) Ribolovno pravo nad ribolovnom zonom izdaje se na period od 10 godina.
- (2) Ribolovna zona koja konkursom nije mogla biti ustupljena na korištenje privremeno se daje na upotrebu bez konkursa pravnom licu koja obavlja djelatnost ribarstva ili udruženju sportskih ribolovaca, do donošenja odluke o davanju ribolovnog prava u skladu sa članom 6. ovog zakona.
- (3) Ustupanje u smislu stava 2. ovog člana može trajati najduže dvije godine.

Član 9.

- (1) Korisnik je dužan vidno označiti granice ribolovne zone, kao i mjesta na ribolovnoj zoni na kojima je zabranjen ribolov (prirodna riblja plodišta i sl.).
- (2) Granice iz stava 1. ovog člana korisnik je dužan označiti u roku od šest mjeseci od dana kada je počeo koristiti ribolovnu zonu, odnosno od dana zaključivanja ugovora, a granice na ribolovnoj zoni na kojoj je zabranjen ribolov tri mjeseca od dana početka zabrane.
- (3) Kantonalni ministar poljoprivrede, šumarstva i vodoprivrede (u daljnjem tekstu: kantonalni ministar) propisuje način označavanja ribolovnog područja, odnosno dijela ribolovnog područja-ribolovne zone.

Član 10.

- (1) Korisnik je dužan najkasnije u roku godinu dana od dana kada je dobio ribolovno pravo na ribolovnoj zoni realizovati predloženi program gospodarenja ribolovnom zonom iz člana 6. stav 1. ovog zakona i donijeti program promicanja ribarstva (u daljnjem tekstu: ribarska osnova).
- (2) Ribarska osnova važi trajno uz monitoring, a najkasnije do isteka roka od pet godina od dana potvrđivanja ribarske osnove, mora se obaviti revizija ribarske osnove.
- (3) Ribarsku osnovu izrađuju pravna lica iz člana 43. ovog zakona.
- (4) U skladu sa ribarskom osnovom korisnik donosi godišnji program unaprjeđenja ribarstva (u daljnjem tekstu: godišnji program).
- (5) Godišnji program mora sadržavati:
 - a) procjenu vrsta, količine riba i njihova prirasta u ribolovnoj zoni;
 - b) dozvoljeni godišnji ulov ribe po vrstama i dozvoljeni dnevni ulov ribe;
 - c) plan poribljavanja prema količinama i vrstama ribe, te novčana sredstva za realizaciju plana;
 - d) mjere i načine zaštite ribolovne zone, organizaciju rada ribočuvarske službe, plan rada na uređenju okoliša;
 - e) planirane sportsko-ribolovne aktivnosti;
 - f) planirana novčana sredstva i svrhu korištenja tih sredstava.
- (6) Godišnji program donosi se do kraja tekuće godine za sljedeću godinu.
- (7) Saglasnost za ribarsku osnovu, reviziju ribarske osnove i godišnje programe, izdaje Federalno ministarstvo poljoprivrede, vodoprivrede i šumarstva (u daljnjem tekstu: Federalno ministarstvo) na osnovu mišljenja kantonalnog ministarstva. Kantonalno ministarstvo dostavlja Federalnom ministarstvu mišljenje na osnovu prethodno pribavljenih mišljenja nadležnih organa jedinica lokalne samouprave.

Član 11.

- (1) Korisnici susjednih ribolovnih područja-ribolovnih zona koji se nalaze na istoj ribolovnoj vodi dužni su svoje programe uskladiti u pogledu mjera zaštite i lova riba, zaštite ribolovnih voda i poribljavanja.
- (2) Korisnik koji je konkursom dobio ribolovno pravo na ribolovnoj zoni, do donošenja ribarske osnove, ribolovnu zonu koristi na osnovu privremenog programa koji se donosi za prvu godinu korištenja.
- (3) Privremeni program korisnik donosi u roku od 60 dana od dana ustupanja ribolovne zone na korištenje.

Član 12.

- (1) Ribarska osnova sadrži:
 - a) osnovne hidrološke, biološke, fizičke, hemijske i druge karakteristike voda ribolovne zone;
 - b) sastav ribljeg fonda po vrstama (kvalitativni i kvantitativni);
 - c) mogućnost i način prirodnog i umjetnog prirasta ribljeg fonda po vrstama riba;
 - d) mjere za zaštitu i lov riba i životinja kojima se ribe hrane;
 - e) mjere za zaštitu ribljeg mrjestilišta, riba i riblje ikre sa plavnih područja;
 - f) mjere za otkrivanje i suzbijanje zagađivača voda ribolovne zone;
 - g) uslove obavljanja sportsko-rekreativnog ribolova i mjere za unaprjeđenje sportsko-rekreativnog ribolova i ribolovnog turizma na ribolovnoj zoni;
 - h) organizaciju ribočuvarske službe;
 - i) program poribljavanja (vrijeme, količina i vrste riba);

- j) sredstva potrebna za provođenje ribarske osnove i način obezbjeđivanja tih sredstava.
- (2) U slučaju pomora riba, većeg od jedne trećine ihtiomase procijenjene ribarskom osnovom, mora se obaviti revizija ribarske osnove.
- (3) Ribarsku osnovu, kao i njenu reviziju, izrađuju pravna lica iz člana 43. ovog zakona.

Član 13.

- (1) Radi evidentiranja podataka o površini ribolovne zone, granicama ribolovne zone, količini i vrstama riba, te o nosiocima ribolovnih prava, u kantonalnom ministarstvu vodi se ribarski katastar.
- (2) Oblik, sadržaj i način vođenja ribarskog katastra iz stava 1. ovog člana propisuje federalni ministar poljoprivrede, vodoprivrede i šumarstva (u daljnjem tekstu: federalni ministar).
- (3) Korisnici ribolovne zone, dužni su dostaviti podatke za vođenje ribarskog katastra iz stava 1. ovog člana kantonalnom ministarstvu do kraja marta tekuće godine za prethodnu godinu.

III – RIBOLOV

Član 14.

- (1) Sportsko-rekreativni ribolov se obavlja sredstvima i priborom kojima se ne ugrožava riba i životinje kojima se ribe hrane.
- (2) Kantonalni ministar donosi propise o načinu, priboru i sredstvima kojima se obavlja ribolov.

Član 15.

- (1) Ribu na ribolovnim vodama mogu loviti ribiči:
 - a) koji imaju položen ispit za lov riba u sportsko-rekreativnom ribolovu (u daljnjem tekstu: ribički ispit);
 - b) koji imaju dozvolu za lov riba u sportsko-rekreativnom ribolovu.
- (2) Odredba stava 1. tačke a. ovog člana ne odnosi se na ribiče strane državljanke.

Član 16.

- (1) Sportsko-ribolovni savez Federacije BiH (u daljnjem tekstu: Savez) vodi evidenciju o položenim ribičkim ispitima prema federalnom Programu za polaganje ribičkog ispita.
- (2) Savez organizuje podjelu dozvola korisnicima ribolovnog prava, a po godišnjem programu takmičenja organizuje, sprovodi i izdaje odobrenje za sva takmičenja u sportsko-rekreativnom ribolovu, osim međunarodnih takmičenja, prikuplja podatke od korisnika ribolovnog prava o količini i sastavu ulova u sportsko-rekreativnom ribolovu, te izdaje ribočuvarske značke i legitimacije na zahtjev korisnika ribolovnog prava.
- (3) Korisnici ribolovnih prava se mogu organizovati u Sportsko-ribolovni savez Hercegovačko – neretvanskog kantona.

Član 17.

- (1) Program i način polaganja ribičkog ispita, obrazac i način izdavanja uvjerenja o položenom ribičkom ispitu propisuje federalni ministar.
- (2) Program za polaganje ribičkog ispita donosi federalni ministar, uz prethodno pribavljeno mišljenje Saveza.
- (3) Provjeru znanja prema Programu za polaganje ribičkog ispita obavlja komisija koju na prijedlog Saveza imenuje federalni ministar.

- (4) Oblik, sadržaj i način vođenja registra o izdanim uvjerenjima o položenom ribičkom ispitu propisuje federalni ministar.

Član 18.

- (1) U sportsko-rekreativnom ribolovu ribiči moraju kod sebe imati dozvolu za ribolovnu zonu na kojoj obavljaju ribolov.
- (2) Dozvole iz stava 1. ovog člana izdaje kantonalno ministarstvo korisniku ribolovne zone posredstvom Saveza.
- (3) Ribiči za obavljanje sportsko-rekreativnog ribolova na određenoj ribolovnoj zoni kupuju dozvole od korisnika ribolovnog prava za tu ribolovnu zonu.
- (4) Korisnik ribolovnog prava ne može dobiti dozvolu za tekuću kalendarsku godinu, ako nema potvrđenu ribarsku osnovu i potvrđen godišnji plan.
- (5) Korisnik ribolovne zone može prodavati dozvole:
 - a) samo za ribolovnu zonu za koju je dobio ribolovno pravo;
 - b) samo ribičima sa položenim ribičkim ispitom;
 - c) ribičima stranim državljanima bez položenog ribičkog ispita.
- (6) Dozvola koja je potvrđena od korisnika ribolovne zone vrijedi samo na ribolovnoj zoni za koju je korisnik dobio ribolovno pravo.
- (7) Izuzetno od odredbi stava 6. ovog člana korisnici ribolovnog prava mogu međusobno ugovoriti pravo reciprociteta ribolova na ribolovnom području ili u ribolovnoj zoni, za koju su dobili ribolovno pravo, ako je to u skladu sa ribarskim osnovama za ta ribolovna područja ili te ribolovne zone, ali takvo pravo reciprocitnog ribolova mora biti naznačeno u dozvoli.
- (8) Federalni ministar propisuje oblik i sadržaj obrasca dozvole za obavljanje sportsko-rekreativnog ribolova.

Član 19.

Privredni ribolov se ne može obavljati na ribolovnom području "HERCEGOVAČKO NERETVANSKO".

IV – AKVAKULTURA

Član 20.

- (1) Akvakultura obuhvata uzgoj riba i drugih vodenih organizama u ribnjacima, ograđenim dijelovima ribolovne vode i kavezima u ribolovnoj vodi.
- (2) Akvakulturom se mogu baviti obrtnici i pravna lica registrovana za obavljanje akvakulture i/ili korisnik ribolovne zone ako je akvakultura predviđena ribarskom osnovom.
- (3) Obrtnici i pravna lica mogu započeti obavljati djelatnost akvakulture ako imaju dozvolu za akvakulturu, koju izdaje kantonalno ministarstvo, uz prethodno pribavljenu veterinarsko-zdravstvenu saglasnost na lokaciju i projektnu dokumentaciju za izgradnju i rekonstrukciju objekata, u skladu sa odredbama Zakona o veterinarstvu ("Službene novine Federacije BiH", broj 46/00).

Član 21.

- (1) Dozvola za akvakulturu, kao i zahtjev za izdavanje dozvole za akvakulturu mora sadržavati:
 - a) firmu obrtnika ili firmu pravnog lica kojoj se izdaje dozvola za akvakulturu;
 - b) naznaku ribolovne zone, na kojoj će se obavljati djelatnost akvakulture;
 - c) površinu ribnjaka, ograđenog vodenog prostora ili zapreminu kaveza koji će se koristiti za akvakulturu;
 - d) vrste riba ili drugih vodenih organizama koji će se uzgajati;
 - e) stručnu studiju o opravdanosti akvakulture;
 - f) koncesiju za korištenje voda za uzgoj riba i/ili drugih vodenih organizama, izdatu u skladu sa posebnim zakonom.
- (2) Zabranjeno je uzgajati vrste riba i/ili drugih vodenih organizama koji nisu upisani u dozvolu za akvakulturu.
- (3) Protiv rješenja kantonalnog ministarstva kojim se uskraćuje dozvola za akvakulturu, može se izjaviti žalba Vladi HNK u roku od 15 dana od dana prijema rješenja.

Član 22.

- (1) Dozvola za akvakulturu prestaje vrijediti prestankom obavljanja djelatnosti, prestankom postojanja pravnog lica, odnosno obrtnika i prestankom ugovora o koncesiji za korištenje voda za uzgoj riba i/ili drugih vodenih organizama.
- (2) Dozvola za akvakulturu oduzima se ako se utvrdi da obrtnik ili pravno lice uzgaja vrste riba i/ili drugih vodenih organizama koji nisu upisani u dozvoli za akvakulturu ili da korisnik ne ispunjava uslove, odnosno obaveze propisane ovim zakonom.
- (3) Rješenje o oduzimanju dozvole za akvakulturu donosi kantonalni poljoprivredni inspektor.
- (4) Protiv rješenja iz stava 3. ovog člana može se izjaviti žalba kantonalnom ministarstvu u roku od 15 dana od dana prijema rješenja.
- (5) Registar o izdatim dozvolama za akvakulturu vodi kantonalno ministarstvo.
- (6) Oblik, sadržaj i način vođenja registra o izdatim dozvolama za akvakulturu propisuje kantonalni ministar.

Član 23.

Na ribolovnoj vodi na kojoj se riba uzgaja u kavezima ili unutar ograda zabranjeno je loviti ribe i obavljati druge radnje koje mogu ometati djelatnost akvakulture na udaljenosti manjoj od 50 metara od označenih granica koncesijom dodijeljene vodene površine.

V - ZAŠTITA RIBA

Član 24.

- (1) Ribolovna zona koja je određena za sportsko- rekreativni ribolov može se koristiti i za sanacijski ribolov.
- (2) Dozvolu za sanacijski ribolov na ribolovnoj zoni iz stava 1. ovog člana izdaje Federalno ministarstvo.
- (3) Dozvolom iz stava 2. ovog člana određuje se vrijeme i način obavljanja ribolova, kao i vrsta i količina ribe koju treba izloviti.

Član 25.

- (1) Ribolov za naučno-istraživačke svrhe na ribolovnim vodama može se obavljati na osnovu dozvole koju izdaje Federalno ministarstvo, na osnovu zahtjeva i predloženog istraživačkog programa.
- (2) U dozvoli za ribolov za naučno-istraživačke svrhe mora biti naznačeno:
 - a) na kojim vodama se obavlja ribolov za naučno-istraživačke svrhe;
 - b) u kojim slučajevima, odnosno pod kojim uslovima;
 - c) u kom vremenu, vrsti i količini ribe;
 - d) način upotrebe sredstava i pribora za obavljanje ovoga ribolova.
- (3) Korisnik dozvole dužan je izvijestiti kantonalno ministarstvo i korisnika o vremenu u kojem će obavljati ribolov za naučno-istraživačke svrhe.

Član 26.

- (1) Ribolov pomoću električne struje (u daljnjem tekstu: elektro-ribolov) na ribolovnoj zoni može se obavljati u slučaju:
 - a) izlovljavanja riba radi poribljavanja;
 - b) uklanjanja manje vrijednih vrsta riba;
 - c) sagledavanja stanja ribljeg fonda, a na osnovu dozvole koju izdaje Federalno ministarstvo.
- (2) Elektroribolov mogu obavljati samo lica koja su stručno osposobljena za tu vrstu ribolova.
- (3) O izvršenom elektroribolovu sastavlja se zapisnik na licu mjesta, uz prisustvo nadležnog kantonalnog poljoprivrednog inspektora, predstavnika korisnika, veterinara i drugih lica.
- (4) Zapisnik ima snagu javne isprave.
- (5) Korištenje EHO sonara na ribolovnoj zoni dozvoljeno je samo za naučno-istraživačke svrhe.

Član 27.

Korisnici dozvola za sanacijski ribolov, ribolov za naučno-istraživačke svrhe i elektroribolov dužni su po izvršenom ribolovu dostaviti izvještaj Federalnom ministarstvu o količini i vrsti ribe, vremenu obavljanja ribolova, mjestu i načinu ribolova, odnosno korištenju pribora i sredstava za obavljeni ribolov.

Član 28.

- (1) Korisnik je dužan svake godine, u skladu sa godišnjim programom obavljati poribljavanje ribolovne zone.
- (2) Poribljavanje ribolovne zone obavlja se zdravom ribom, ribljom mladi i oplodenom ikrom, nakon izvršene zdravstvene kontrole i utvrđivanja kakvoće ribe, riblje mladi, ikre i ribolovne vode.
- (3) Federalni ministar odobrava unos novih vrsta ribe u ribolovnu vodu, nakon pribavljenog mišljenja pravnog lica iz člana 43. ovoga Zakona.

Član 29.

- (1) Fizička i pravna lica koje provode određene djelatnosti na vodotocima i akumulacijama i dovedu do pomora ribe, a za koju se utvrdi da su je prouzrokovali, moraju korisniku ribolovne zone nadoknaditi štetu.

- (2) Izgradnja ili rekonstrukcija brane, vodoprivrednog ili drugog objekta ili postrojenja na ribolovnoj vodi može se obavljati pod uslovima da se obezbijedi nesmetano razmnožavanje ribe, zaštita ribljeg fonda i migracija ribe.
- (3) Ukoliko se ne obezbijedi slobodna migracija ribe iz stava 2. ovog člana, investitor, odnosno drugi korisnik brane, vodoprivrednog ili drugog objekta ili postrojenja, dužan je nadoknaditi pričinjenu štetu korisniku ribolovne zone saglasno odštetnom cjenovniku u ribarstvu i donijeti program revitalizacije životnih zajednica i dovesti ih u odgovarajuće stanje, uz osiguranje kontinuiranog poribljavanja radi održavanja prirodne reprodukcije.
- (4) Korisnici dovodnih, turbinskih i drugih kanala dužni su ugraditi i održavati uređaje za sprječavanje ulaza ribe u te kanale.
- (5) Agencija za vodno područje Jadranskog mora Mostar organizuje hidrološki monitoring i monitoring kvalitete voda.

Član 30.

- (1) U prirodnim ribljim mrjestilištima zabranjeno je vaditi šljunak, kamen i panjeve, a u vrijeme mriješta zabranjeno je obavljati i druge radnje koje ometaju mriješt.
- (2) U prirodnim ribljim mrjestilištima zabranjene su sve vrste ribolova, osim sanacionog ribolova predviđenim ribarskom osnovom koji se obavlja radi zaštite ugroženih vrsta riba, riblje mlađi i ikre.
- (3) Aktom o proglašenju prirodnog ribljeg mrjestilišta mogu se odrediti i druge mjere zaštite.

Član 31.

Radi zaštite riba i unaprjeđenja ribarstva kantonalno ministarstvo određuje lovostaj za sve ili pojedine vrste ribe na ribolovnom području ili na ribolovnim zonama, kao i zabranu lova riba koje nemaju propisanu veličinu u skladu sa federalnim Pravilnikom o načinu, alatima i sredstvima kojima se obavlja ribolov.

Član 32.

Veterinarsko-zdravstvena zaštita ribljeg fonda u ribolovnim vodama i ribnjacima obavlja se na način kako je to regulisano odredbama Zakona o veterinarstvu, kao i propisima donesenim na osnovu njega.

VI - RIBOČUVARSKA SLUŽBA

Članak 33.

- (1) Radi zaštite ribolovne zone korisnici ribolovnog prava obavezni su organizovati ribočuvarsku službu.
- (2) Ribočuvarsku službu obavljaju ribočuvari koji moraju imati položen ribički ispit i najmanje IV stepen obrazovanja-poljoprivrednog ili veterinarskog smjera.
- (3) Ribočuvar imenuje korisnik ribolovnog prava za ribolovnu zonu za koju je dobio ribolovno pravo.
- (4) Udruženje sportskih ribolovaca koje koristi ribolovnu zonu može, pored ribočuvara da obezbijede čuvanje ribolovne zone preko svojih članova.

Član 34.

- (1) Ribočuvar ima legitimaciju i značku kojima se dokazuje njegovo službeno svojstvo, identitet i ovlaštenja.

- (2) Legitimaciju i značku iz stava 1. ovog člana ribočuvaru izdaje korisnik ribolovne zone.
- (3) Organizaciju i rad ribočuvarske službe, oblik i sadržaj obrasca legitimacije i značke ribočuvara propisuje federalni ministar.

Član 35.

- (1) Prilikom obavljanja svoje djelatnosti ribočuvar je ovlašten da od ribiča:
 - a) zatraži dozvolu za obavljanje ribolova;
 - b) pregleda ribolovni pribor, opremu za ribolov i ulov;
 - c) zatraži ličnu kartu ili drugu ispravu na osnovu koje može utvrditi njegov identitet.
- (2) Kada utvrdi protuzakonito postupanje ribočuvar je ovlašten:
 - a) ukoliko dužina ulovljene ribe nije u skladu sa propisanom dužinom za određenu vrstu ribe, naložiti vraćanje ulovljene ribe u vodu i opomenuti ribiča na zakonsku obavezu poštivanja određene dužine;
 - b) ukoliko ulovljena riba ne odgovara zakonom propisanoj dužini, a više nije živa, oduzet će pribor kojim je izvršen ribolov sa ulovom, i sačiniti zapisnik o zapljeni;
 - c) ukoliko lice u ribolovu odbije da se legitimiše, ribočuvar je dužan bez sukoba potražiti drugi izvor moguće identifikacije (registracijski broj automobila ili motocikla, svjedoka koji poznaje lice koe izbjegava identifikaciju i sl.);
 - d) ukoliko to nije moguće, pozvat će patrolu MUP-a ili korisnika ribolovne vode radi upućivanja poziva za pomoć;
 - e) ukoliko ribočuvar u radu zatekne lice ili lica koja obavljaju kazneno djelo na ribolovnoj zoni, mora osigurati pomoć MUP-a ili volonterske ribočuvarske službe, pa tek onda pokušati identifikovati i legitimisati lica koje vrše ribokradu;
 - f) ukoliko ribočuvar u radu pronade mreže, pribor i druga sredstva za ribokradu, dužan je prvo obezbijediti oidršku MUP-a ili dva predstavnika volonterske ribočuvarske službe;
 - g) organizovati noćni obilazak i akcije u dogovoru sa MUP-om, sa najmanje dva predstavnika MUP-a ili dva predstavnika volonterske ribočuvarske službe;
 - h) zatražiti isprave o identifikaciji i dozvole za ribolov od lica koja love ribu na obali ili se nalaze na čamcima ili drugim plovnim objektima na ribolovnoj vodi, kao i od lica koja se nalaze u neposrednoj blizini ribolovnih voda u šatorima ili vozilima, a sa sredstvima za ribolov;
 - i) provjeriti je li se lice koje se kontroliše pridržava propisanih minimalnih mjera i dozvoljenog maksimalnog ulova.
- (3) Ako ribočuvar zatekne na ribolovnim vodama na kojima obavlja ribočuvarsku službu, lice koje obavlja sportsko- rekreativni ribolov ili druge radnje protivne ovom zakonu i propisima donesenim na osnovu njega, dužan je u roku od tri dana o tome sastaviti zapisnik i dostaviti ga kantonalnom poljoprivrednom inspektor.
- (4) Ako ribočuvar privremeno oduzme ribolovni pribor, opremu za ribolov ili ulov, dužan je u roku od 24 sata o tome sastaviti zapisnik i dostaviti ga kantonalnom poljoprivrednom inspektor, te dostaviti kopiju pismene potvrde o privremenom oduzimanju.
- (5) Lice kojem je privremeno oduzet ribolovni pribor, oprema za ribolov ili ulov izdaje se potvrda o tačno označenim predmetima ili ulovom po vrsti i količini.
- (6) Ribočuvar je ovlašten da privremeno oduzme i bez odlaganja preda korisniku ribolovnog prava ulov, sredstva i pribor za ribolov, kao i druge predmete pronađene na ribolovnoj zoni, ako postoji osnovana sumnja da su upotrebljeni ili bili namijenjeni za izvršavanje prekršaja, ili su nastali ili pribavljeni izvršenjem prekršaja.

- (7) S privremeno oduzetim ribolovnim priborom, opremom za ribolov ili ulovom, korisnik ribolovnog prava ne može raspolagati (uništiti, prodati, predati, darivati, zamijeniti i sl.), do okončanja prekršajnog postupka ili postupka pred drugim nadležnim organom.
- (8) Zapisnik i potvrda iz stava 5. ovog člana koriste se u prekršajnom postupku kao dokaz uz prijavu za pokretanje prekršajnog postupka koju podnosi kantonalni poljoprivredni inspektor.
- (9) Ribiči su dužni ribočuvarima omogućiti obavljanje ribočuvarskog nadzora i pružiti im sve potrebite podatke u vezi sa obavljanjem ribočuvarskog nadzora.

Član 36.

Odredbe ovog zakona odnose se i na uzgoj, zaštitu i lov rakova, školjki, žaba, pijavica, kornjača, zmija, kao i na druge životinje koje žive u ribolovnoj vodi i kojima se ribe hrane.

Član 37.

Udruženja sportskih ribolovaca, ribiči i druga fizička lica ne mogu ulovljenu ribu u sportsko- rekreativnom ribolovu stavljati u promet.

Član 38.

- (1) RIBE koje su ulovljene prije ustanovljenja lovostaja ne mogu se stavljati u promet poslije isteka 48 sati od ustanovljenja lovostaja.
- (2) U vrijeme lovostaja fizičko i pravno lice može stavljati u promet ribu na koju se odnosi lovostaj, ako ima pisani dokaz o:
 - a) porijeklu, odnosno uvozniku ribe;
 - b) vrsti i količini ribe;
 - c) kupovini ribe.

Član 39.

Pri prometu ribe koje nemaju propisanu veličinu, fizičko i pravno lice mora imati pisane dokaze navedene u članu 39. stav 2. ovog zakona.

Član 40.

- (1) Na ribolovnoj zoni i drugoj ribolovnoj vodi zabranjeno je:
 - a) loviti ribu eksplozivom i drugim rasprskavajućim sredstvima;
 - b) loviti i uništavati ribu i riblju mlađ u vrijeme lovostaja;
 - c) loviti ribu harpunom, ostima i drugim zabranjenim sredstvima i priborom, vatrenim oružjem ili hemijskim i drugim sredstvima koja ubijaju i truju ili omamljuju ribu;
 - d) loviti ribu neposredno rukom;
 - e) zagađivati ribolovnu vodu štetnim i opasnim materijama koje mogu mijenjati ili pogoršavati ustaljeni kvalitet vode ili dijela ribolovne vode i na taj način ugrožavati riblji fond;
 - f) odlagati otpadni materijal u ribolovne vode (kabasti materijal, smeće, i sl.);
 - g) poribljavati ribolovne vode nekvalitetnom i bolesnom ribom, ribljom mlađi i oplodenom ikrom;
 - h) pregrađivati vodeni tok privremenim ili stalnim pregradama koje ometaju prolaz ribe, ako to nije predviđeno investiciono-tehničkom dokumentacijom za izgradnju ili rekonstrukciju objekata ili postrojenja ili ribarskom osnovom;
 - i) zatvarati, odvrćati i crpiti vodu iz ribolovne vode, ako to uzrokuje opasnost za opstanak ribe;

- j) naglo ispuštati vodu iz prirodnih i umjetnih jezera i drugih akumulacija, ako se time ugrožava opstanak ribe;
 - k) močiti lan, konoplju, divizmu i druge biljke koje štete ribljem fondu;
 - l) loviti ribu na ribolovnoj vodi na odstojanju manjem od 300 metara od brana hidroelektrana ili sličnog postrojenja na kojem postoji riblja staza, izuzev u gornjem kompenzacijskom bazenu (jezero Vratak PHE Čapljina) u svrhu sportsko-rekreativnog ribolova;
 - m) ometati postavljanje znakova kojima se označava ribolovna zona, prirodno riblje mrjestilište, ribnjak ili ribolovna voda za ribolov pod posebnim uslovima i mjestima na kojima je ribolov zabranjen, kao i obavljati oštećenje i premještanje znakova;
 - n) loviti noću na ribolovnoj zoni;
 - o) sprječavati spašavanje ribe i riblje mlađi sa zemljišta koje je poplavljeno;
 - p) držanje sredstava i pribora za privredni ribolov u objektima i na objektima koji se nalaze na ribolovnoj vodi ili na drugim objektima koji se nalaze uz ribolovnu zonu;
- (2) Odredbe stava 1. tačke d., e., f., h. i j. ovog člana odnose se i na akvakulturu.

Član 41.

- (1) Korisnik ribolovne zone dužan je poduzimati potrebne mjere za vraćanje riba u ribolovnu vodu sa zemljišta koje je poplavljeno.
- (2) Korisnik zemljišta koje je poplavljeno dužan je omogućiti spašavanje riba i riblje mlađi sa tog zemljišta.
- (3) Riba koja se nalazi na zemljištu koje je bilo poplavljeno pripada korisniku ribolovnog područja.

Član 42.

- (1) Poslove u području slatkovodnog ribarstva obavljaju pravna lica koja su registrovana za stručna i naučna istraživanja iz područja slatkovodnog ribarstva ili ekologije kopnenih voda.
- (2) Pravna lica iz stava 1. ovog člana obavljaju sljedeće poslove:
 - a) izrađuju ribarske osnove;
 - b) izrađuju revizije ribarskih osnova;
 - c) izrađuju stručne studije i procjene stanja ribljeg fonda, te predlažu mjere za zaštitu riba i unaprjeđenje ribarstva;
 - d) raščlanjuju podatke o akvakulturi, te predlažu mjere za unaprjeđenje akvakulture;
 - e) obavljaju hemijska istraživanja vode u akvakulturi i ribolovnim vodama;
 - f) obavljaju istraživanja na području primarne organske produkcije za potrebe ribarstva;
 - g) obavljaju istraživanja na području sekundarne organske produkcije za potrebe ribarstva;
 - h) obavljaju istraživanja uticaja unošenja ribljih vrsta u ribolovne vode;
 - i) obavljaju istraživanja uzgoja autohtonih i alohtonih vrsta riba;
 - j) izdaju certifikate o porijeklu i genetičkoj autohtonosti;
 - k) izdaju certifikate o kvalitetu.
- (3) Pravna lica iz stava 1. ovog člana dužna su o obavljanju poslova iz svoje djelatnosti, a vezano za ribarstvo, najmanje jednom godišnje dostaviti izvještaj Federalnom ministarstvu.

VII NADZOR

Član 43.

- (1) Kantonalno ministarstvo obavlja upravni nadzor nad provođenjem ovoga zakona i propisa donesenih na osnovu njega u poslovima koji su dati u nadležnost kantona.
- (2) Inspekcijski nadzor nad izvršavanjem odredbi ovog Zakona i propisa donesenih na osnovu njega vrši kantonalni poljoprivredni inspektor.

Član 44.

- (1) U provođenju inspekcijskog nadzora iz oblasti slatkovodnog ribarstva kantonalni poljoprivredni inspektor je ovlašten i obavezan:
 - a) izvršiti kontrolu donošenja i izvršenja godišnjeg plana, odnosno pojedinih mjera utvrđenih tim planom;
 - b) izvršiti kontrolu poribljavanja ribolovne vode ribom, ribljom mladi ili oplodnom ikrom;
 - c) izvršiti kontrolu izdavanja ribolovnih dozvola od izdavatelja dozvole do krajnjeg korisnika;
 - d) izvršiti kontrolu vođenja službenih podataka za područje kantona o povredama odredbi ovog zakona i propisa donesenih na osnovu njega;
 - e) izvještavati mjerodavne organe o nepravilnostima i predlagati provođenje određenih mjera, ako sam nije ovlašten za poduzimanje odgovarajućih mjera;
 - f) podnositi prijavu za pokretanje prekršajnog postupka radi povrede odredbi ovoga zakona i propisa donesenih na osnovu njega.
- (2) Kada utvrdi da je povrijeđen ovaj zakon ili drugi propis donesen na osnovu njega, inspektor ima pravo i obavezu da:
 - a) zabrani izgradnju ili rekonstrukciju vodoprivrednog ili drugog objekta ili postrojenja na ribolovnoj vodi koje sprječava nesmetano razmnožavanje ribe, zaštitu ribljeg fonda i migraciju ribe;
 - b) zabrani akvakulturu i promet ribe, riblje mladi i oplodene ikre, ako se obavlja suprotno odredbama ovoga zakona;
 - c) zabrani lov ribe nedozvoljenim sredstvima;
 - d) zabrani ispuštanje štetnih i opasnih tvari u ribolovnu vodu;
 - e) zabrani pregrađivanje vodenog toka privremenim ili stalnim pregradama koje ometaju prolaz ribe, ako to nije predviđeno investiciono-tehničkom dokumentacijom;
 - f) zabrani zatvaranje ili crpljenje vode iz ribolovne zone, ako se time prouzroči opasnost za opstojnost ribe;
 - g) zabrani naglo ispuštanje vode iz prirodnih i umjetnih jezera i drugih akumulacija, ako se time prouzrokuje opasnost za opstanak ribe;
 - h) zabrani močenje lana, konoplje, divizme i drugih štetnih biljaka u ribolovnoj vodi;
 - i) zabrani lov ribe, ako se isti vrši suprotno članu 40. stav 1. tačka l. ovoga zakona;
 - j) narediti spašavanje ribe i riblje mladi sa zemljišta koje je poplavljeno;
 - k) zabraniti kretanje licima bez dozvole i sa sredstvima i priborom za ribolov van puteva pored ribolovne zone, ribnjaka ili drugih ribolovnih voda;
 - l) zabrani držanje sredstava i pribora za ribolov u objektima i na objektima koji se nalaze na ribolovnoj vodi ili na drugim objektima ribolovne zone, licu koje nije ovlašteno da obavlja ribolov;
 - m) privremeno, do odluke nadležnog organa, oduzme od korisnika ili fizičkog lica sredstva i pribor za ribolov, kao i ulov i druge predmete upotrijebljene za

obavljanje radnje kažnjive po ovom zakonu i predmete nastale izvršenjem takve radnje i bez odlaganja preda mjerodavnom organu;

- n) uzima službene uzorke radi analize u nadležnoj laboratoriji;
 - o) nadzire izdavanje ribolovnih dozvola od izdavaoca dozvole do krajnjeg korisnika;
 - p) vodi službene podatke za područje kantona o povredama odredbi ovog zakona i propisa donesenih na osnovu njega;
 - q) izvještava nadležne organe o nepravilnostima i predlaže provođenje određenih mjera, ako sam nije ovlašten za preduzimanje odgovarajućih mjera;
 - r) podnosi prijavu za pokretanje prekršajnog postupka radi povrede odredbi ovog zakona i propisa donesenih na osnovu njega.
- (3) Kada kantonalni inspektor prilikom obavljanja inspekcijskog nadzora utvrdi da propis nije primijenjen ili je nepravilno primijenjen, donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.
- (4) Ako je zakonom ili drugim propisom predviđeno da se za utvrđene nepravilnosti primjenjuju određene upravne mjere, inspektor će u rješenju iz stava 2. ovog člana izreći i tu mjeru.
- (5) Protiv rješenja kantonalnog poljoprivrednog inspektora može se izjaviti žalba kantonalnom ministarstvu u roku od 15 dana od dana prijema rješenja.
- (6) Protiv rješenja kantonalnog ministarstva može se pokrenuti upravni spor.
- (7) Kad je za izvršavanje poslova inspekcijskog nadzora potrebno uzeti uzorke i obavljati analizu kantonalni poljoprivredni inspektor će uzeti uzorke (u daljem tekstu: službeni uzorak) i dati ih na laboratorijske pretrage u laboratorije koje ispunjavaju uslove za takve pretrage i analize.
- (8) Troškove analize službenih uzoraka nastalih u postupku snosi stranka.

VIII – KAZNE NE ODREDBE

Član 45.

- (1) Novčanom kaznom od 2.000,00 KM do 8.000,00 KM kaznit će se pravno lice za prekršaj ako:
- a) ustupljeno mu ribolovno pravo ustupi drugom na korištenje (član 7. stav 2.);
 - b) ne donese ribarsku osnovu, godišnji program i ne obavi reviziju ribarske osnove (član 10. stav 1. i član 12.);
 - c) započne obavljati djelatnost akvakulture bez dozvole (član 20. stav 3.);
 - d) vrši djelatnost akvakulture nakon oduzimanja dozvole za akvakulturu (član 22.)
 - e) obavlja sanacioni i naučno-istraživački ribolov suprotno članu 24. i 25;
 - f) obavlja ili omogućuje elektroribolov suprotno članu 26.;
 - g) ne podnese izvještaj Federalnom ministarstvu o količini i vrsti ribe, vremenu obavljanja ribolova, mjestu i načinu ribolova, odnosno korištenju pribora i sredstava (član 27.);
 - h) svake godine ne vrši poribljavanje u skladu sa godišnjim programom (član 28. stav 1);
 - i) vrši poribljavanje ribolovne vode suprotno odredbama člana 28. stav 2. i 3.;
 - j) svojom djelatnošću prouzrokuje pomor ribe (član 29. stav 1);
 - k) gradi ili vrši rekonstrukciju vodoprivrednog ili drugog objekta ili postrojenja na ribolovnoj vodi suprotno članu 29. stav 2. i 3.;
 - l) korisnici dovodnih, turbinskih i drugih kanala ne ugrade i održavaju uređaje za sprječavanje ulaza ribe u te kanale (član 29. stav 4.);

- m) u prirodnim ribljim mrjestilištima vadi šljunak, pijesak, kamen, panjeve i vrši druge radnje koje ometaju mrjest, odnosno organizuje ribolov (član 30. stav 1.);
 - n) za vrijeme lovostaja vrši ribolov onih vrsta riba i lov rakova, školjki, žaba, pijavica i kornjača na koje se lovostaj odnosi (član 31. i 36.);
 - o) ne osigura čuvanje ribolovne zone (član 33. stav 1.);
 - p) vrši lov riba, rakova, školjki, žaba, pijavica i kornjača koje nemaju propisanu veličinu (član 31. i 36.);
 - q) stavlja u promet ribe koje su ulovljene prije, odnosno 48 sati nakon ustanovljenja lovostaja i ako za ribe za koje se lovostaj odnosi stavlja u promet i ne posjeduje pisani dokaz o porijeklu, odnosno uvozniku ribe, vrsti i količini ribe, kao i datumu i mjestu ulova ribe (član 38.);
 - r) postupi suprotno članu 40. stav 1. tačke a., e., f., g., i. i j.
- (2) Za prekršaj iz stava 1. ovog člana kaznit će se i odgovorno lice u pravnom licu novčanom kaznom od 500,00 KM do 2.000,00 KM.

Član 46.

- (1) Novčanom kaznom od 1.000,00 KM do 5.000,00 KM kaznit će se za prekršaj pravno lice, ako:
- a) vidno ne označi granice ribolovne zone ili mjesto na kome je zabranjen ribolov (član 9. stav 1.);
 - b) ne uskladi programe sa susjednim korisnikom ribarskog područja-ribolovne zone (član 11. stav 1.);
 - c) ne donese privremeni program u skladu sa članom 11. stav 2. i 3.;
 - d) kao korisnik ne dostavi podatke za vođenje ribarskog katastra (član 13. stav 3.);
 - e) vrši ribolov za naučno-istraživačke svrhe bez dozvole Federalnog ministarstva (član 25. stav 1.);
 - f) kao korisnik dozvole za ribolov za naučno-istraživačke svrhe ne obavijesti kantonalno ministarstvo i korisnika ribolovne zone (član 25. stav 3.);
 - g) unese novu vrstu ribe u ribolovne vode bez odobrenja federalnog ministra (član 28. stav 3.);
 - h) ribočuvar obavlja ribočuvarsku službu suprotno odredbama člana 33. stav 2.;
 - i) ne izda ribočuvaru legitimaciju na propisanom obrascu (član 34. stav 2.);
 - j) u prometu ribe nema pisani dokaz za ribu koja nema propisanu veličinu, pisani dokaz o porijeklu, odnosno uvozniku ribe i količini ribe, kao i datumu i mjestu ulova, odnosno kupovini ribe (član 39.);
 - k) učini neku od radnji iz člana 40. stav 1. tačke d., k. i o.;
 - l) kao korisnik ribolovne zone ne poduzme potrebne mjere vraćanja riba sa poplavljenog zemljišta (član 41. stav 1.).
- (2) Za prekršaj iz stava 1. ovog člana kaznit će se odgovorno lice u pravnom licu novčanom kaznom od 500,00 KM do 2.000,00 KM.
- (3) Za prekršaj iz stava 1. tačke e., j. i k. ovog člana, pored novčane kazne izriče se i zaštitna mjera oduzimanja predmeta koji su upotrebljeni ili bili namijenjeni obavljanju prekršaja ili su nastali njegovim izvršenjem, a za prekršaj iz tački e., g., h. i k. i zaštitna mjera oduzimanja imovinske koristi pribavljene počinjenjem prekršaja.

Član 47.

- (1) Novčanom kaznom od 1.000,00 KM do 3.000,00 KM kaznit će se udruženje sportskih ribolovaca, ako:

- a) kao korisnik ribolovne zone ribolovno pravo ustupi drugom subjektu na korištenje (član 7. stav 2.);
 - b) kao korisnik ribolovne zone vidno ne označi granice ribolovne zone i mjesta na kojima je zabranjen ribolov (član 9. stav 1.);
 - c) kao korisnik ne donese ribarsku osnovu, godišnji program i ne uradi reviziju ribarske osnove (član 10.);
 - d) kao korisnik ne dostavi podatke za vođenje ribarskog katastra (član 13. stav 3.);
 - e) organizuje ribolov na način, sredstvima i priborom koji nisu dozvoljeni ovim zakonom i posebnim propisom (član 14. stav 1.);
 - f) uzgaja vrstu ribe ili drugih vodenih organizama koji nisu upisani u dozvolu za akvakulturu (član 22. stav 2.);
 - g) lovi ribu i obavlja druge radnje koje ometaju djelatnost akvakulture (član 23.);
 - h) kao korisnik ribolovne zone dozvoli elektroribolov suprotno odredbama člana 26.;
 - i) vrši poribljavanje ribolovne zone suprotno odredbama člana 28. stav 2.;
 - j) unosi novu vrstu ribe u ribolovnu vodu bez odobrenja federalnog ministra (član 28. stav 3.);
 - k) organizuje sportski ribolov u prirodnim ribljim mrjestilištima suprotno članu 30. stav 2.;
 - l) ne obezbjeđuje i ne organizuje čuvanje ribolovne zone (član 33. stav 1.);
 - m) ribočuvar nema legitimaciju i značku kojima dokazuje službeno svojstvo (član 34. stav 1.);
 - n) ribočuvar postupi suprotno članu 35. stav 4., 5. i 6.;
 - o) za vrijeme lovostaja organizuje lov riba, rakova, školjki, žaba, pijavica i kornjača na koje se lovostaj odnosi (član 31.);
 - p) stavlja u promet ulovljenu ribu suprotno članu 37.;
 - q) na ribolovnoj zoni učini neku od radnji suprotno članu 40. stav 1. tačke d., g., j., m. i n.;
 - r) postupi suprotno članu 40. stav 1. tačke e., f., g. i j.;
 - s) ne poduzima potrebne mjere za vraćanje riba sa zemljišta koje je poplavljeno u ribolovnu vodu (član 41. stav 1.);
- (2) Za prekršaj iz stava 1. ovog člana kaznit će se novčanom kaznom od 200 KM do 1.000 i odgovorno lice u udruženju sportskih ribolovaca.
- (3) Za prekršaj iz stava 1. tačke e., j., o., p. i s. pored novčane kazne izriče se i zaštitna mjera oduzimanjem predmeta koji su upotrebljeni ili su bili namijenjeni njegovim obavljanjem, a za prekršaj iz tačke e., j. i k. i zaštitna mjera oduzimanja imovinske koristi pribavljene počinjenjem prekršaja.

Član 48.

- (1) Novčanom kaznom od 200,00 KM do 1.000,00 KM kaznit će se za prekršaj fizičko lice i ribič, ako:
- a) obavlja sportski ribolov zabranjenim sredstvima i alatima (član 14.);
 - b) bez dozvole korisnika ribolovne zone obavlja ribolov (član 18. stav 2.);
 - c) postupi suprotno zabrani iz člana 23.;
 - d) postupi suprotno članu 30. stav 1. i 2.;
 - e) stavlja u promet ulovljenu ribu (član 37.);
 - f) ako postupi suprotno članu 40. stav (1) tačke a., b., c., d., e., f., k., l., n., o. i p.
- (2) Za prekršaj iz stava 1. ovog člana, pored novčane kazne, izriče se i zaštitna mjera oduzimanja predmeta koji su upotrebljeni ili bili namijenjeni izvršavanju prekršaja ili su nastali njegovim počinjenjem kao i zaštitna mjera oduzimanja imovinske koristi

dobijene počinjenjem prekršaja i izreći zaštitna mjera zabrane obavljanja ribolova i oduzimanja dozvole za ribolov u trajanju od jedne godine.

Član 49.

Sredstva dobivena od novčanih kazni za prekršaje i izrečenih zaštitnih mjera po odredbama ovog Zakona su prihod Budžeta HNK.

IX – PRIJELAZNE I ZAVRŠNE ODREDBE

Član 50.

- (1) Ribiči, ribočuvari i članovi udruženja sportskih ribolovaca iz člana 33. stav (4) ovog zakona imaju pravo pristupa i kretanja ribolovnim vodama i prilazima preko zemljišta koje se nalaze uz ribolovnu zonu. To pravo ne odnosi se na zemljište koje je sastavni dio dvorišta, ograđenog vrta ili voćnjaka, na zemljište na koje je pristup posebnim propisima zabranjen ili ograničen, u skladu sa posebnim zakonima iz oblasti imovinsko-pravnih odnosa.
- (2) Korisnici ribolovne zone dužni su u roku od godinu dana od dana stupanja na snagu ovog zakona uskladiti svoje poslovanje sa odredbama ovog zakona.

Član 51.

Ribarska osnova, odnosno godišnji program za ribolovnu zonu donesen po propisima o ribarstvu koji su važili do dana stupanja na snagu ovoga zakona, primjenjivat će se do isteka njegovog roka važenja.

Član 52.

- (1) Danom stupanja na snagu ovog Zakona na području HNK prestaje primjena Zakona o slatkovodnom ribarstvu Hercegovačko-neretvanskog kantona („Službene novine HNK“, broj: 04/14)
- (2) Stupanjem na snagu ovog Zakona stavlja se van snage Pravilnik o programu i načinu polaganja ribočuvarskog ispita („Službene novine HNK“, broj: 11/15).
- (3) Na području HNK primjenjivat će se ostali podzakonski propisi doneseni na osnovu Zakona o slatkovodnom ribarstvu Hercegovačko-neretvanskog kantona („Službene novine HNK“, broj: 04/14), ukoliko nisu u suprotnosti sa odredbama ovog Zakona.

Član 53.

Ovaj zakon stupa na snagu osmog dana od dana objavljivanja u "Službenim novinama HNK".

Bosna i Hercegovina
Federacija Bosne i Hercegovine
Hercegovačko-neretvanski kanton
S K U P Š T I N A

Broj:
Mostar, _____. godine

P R E D S J E D A V A J U Ć I
Džafer Alić v.r.

O B R A Z L O Ž E N J E
UZ NACRT ZAKONA O SLATKOVODNOM RIBARSTVU
HERCEGOVAČKO-NERETVANSKOG KANTONA

I. USTAVNO PRAVNI I ZAKONSKI OSNOV ZA DONOŠENJE ZAKONA

Ustavna osnova za donošenja Zakona o slatkovodnom ribarstvu Hercegovačko-neretvanskog kantona sadržan je u odredbi čl. III.2. i III.3. Ustava FBiH, kao i u čl. 16., 17. i 39. stav 1. točka f) Ustava Hercegovačko-neretvanskog kantona.

Navedenim odredbama propisana je nadležnost federalnih i kantonalnih vlasti u oblasti korištenja prirodnih bogatstava, dok je u članu 39. stav 1. tačka f) Ustava Hercegovačko-neretvanskog kantona propisana ovlast Skupštine Hercegovačko-neretvanske kantona za donošenje Zakona.

Zakonska osnova za donošenje ovoga Zakona sadržana je u odredbama člana 21. stav 1., a u vezi s članom 39. stav 1. tačka c) Zakona o organizaciji organa uprave u Hercegovačko-neretvanskom kantonu („Službene novine Hercegovačko-neretvanskog kantona“, broj: 09/09).

II. RAZLOZI ZA DONOŠENJE ZAKONA I OBJAŠNJENJE ODABRANE POLITIKE

Ministarstvo je u 2024. godini pripremilo Prijedlog Zakona o izmjenama i dopunama Zakona o slatkovodnom ribarstvu HNK i isti uputilo na mišljenja. Ministarstvo pravosuđa, uprave i lokalne samouprave HNK dalo je mišljenje broj: 03-02-692/25 od 23.01.2025. godine da se prilikom izrade kantonalnog Zakona treba dosljedno pridržavati odredbi Zakona o slatkovodnom ribarstvu („Službene novine FBiH“ 64/04, 27/10). Također, u Mišljenju Ministarstva pravosuđa uprave i lokalne samouprave HNK navodi se kako predložene izmjene Zakona o izmjenama i dopunama Zakona o slatkovodnom ribarstvu HNK obuhvataju preko 50 posto osnovnog teksta Zakona, te predlažu da se uradi Novi Zakon.

Nakon konsultacija u Ministarstvu je zauzet stav da se pristupi izradi novog Nacrta Zakona o slatkovodnom ribarstvu HNK.

Kod izrade ovog Nacrta Zakona vodilo se računa o odredbama Federalnog Zakona o slatkovodnom ribarstvu („Službene novine FBiH“, broj 64/04, 27/10, 10/25). U zadnjoj izmjeni federalnog Zakona usklađivale su se odredbe Zakona sa Presudom Ustavnog suda FBiH broj U-24/16 („Službene novine FBiH“, br. 8/18) koja je donesena po tužbi Općine Olovo i kojom su odredbe čl. 5, 6, 10. stav 7., 17. i 18. stav 6. Zakona o slatkovodnom ribarstvu FBiH proglašene neustavnim, te je naloženo da se jedinice lokalne samouprave moraju uključiti po pitanju utvrđivanja politike upravljanja ovim prirodnim resursima.

III. OBRAZLOŽENJE PREDLOŽENIH PRAVNIH RJEŠENJA

Član 5.

U tekst člana 5. dodana je obaveza da kantonalno ministarstvo prilikom ustupanja dijelova ribolovnog područja-ribolovne zone, na korištenje fizičkom i pravnom licu, odnosno udruženju sportskih ribolovaca moraju prethodno dobiti mišljenje nadležnog organa jedinice lokalne samouprave, na čijem teritoriju se nalazi dio ribolovnog

područja- ribolovna zona , a sve u skladu sa Zakonom o izmjenama i dopuni Zakona slatkovodnom ribarstvu („Službene novine FBiH“, broj 10/25).

Član 6.

U članu 6. stav (2) propisano je da Vlada HNK utvrđuje visinu naknade za ribolovne zone na prijedlog nadležnog organa jedinica lokalne samouprave za određenu ribolovnu zonu u skladu sa Zakonom o izmjenama i dopuni Zakona slatkovodnom ribarstvu („Službene novine FBiH“, broj 10/25).

U stavu (3) je definisan način raspodjele sredstava od naknada za ustupanje na korištenje ribolovnog prava su namjenska sredstva koja se uplaćuju u Budžet HNK i dijele u omjeru 50% lokalnoj samoupravi na čijoj teritoriji je ribolovna zona, a 50% kantonu, a u skladu sa Zakonom o izmjenama i dopuni Zakona slatkovodnom ribarstvu („Službene novine FBiH“, broj 10/25). Ovaj način uplate definisan je članom 21. Zakona o izvršenju Budžeta Hercegovačko-neretvanske kantona za 2025. godinu kojim je propisano da prihodi koje budžetski korisnici ostvaruju obavljanjem aktivnosti iz zakonom propisanih nadležnosti kao i drugih aktivnosti iz okvira svoje nadležnosti, moraju se uplaćivati na depozitni račun javnih prihoda Budžeta.

Član 10.

U članu 10. stav (7) dodana je odredba da saglasnost za ribarsku osnovu, reviziju ribarske osnove i godišnje programe, izdaje Federalno ministarstvo poljoprivrede, vodoprivrede i šumarstva na osnovu mišljenja kantonalnog ministarstva, uz prethodno dobijeno mišljenje nadležnih organa jedinica lokalne samouprave, a sve u skladu sa Zakonom o izmjenama i dopuni Zakona o slatkovodnom ribarstvu („Službene novine FBiH“, broj 10/25).

IV. OČEKIVANI UČINAK ZAKONA

Ovim Nacrtom Zakona obezbjeđuje se uključivanje jedinica lokalne samouprave u postupke koji su regulisani ovim Zakonom, što je u skladu sa Zakonom o izmjenama i dopuni Zakona o slatkovodnom ribarstvu („Službene novine FBiH“, broj 10/25) i Presudom Ustavnog suda FBiH broj U-24/16 („Službene novine FBiH“, br. 8/18) koja je donesena po tužbi Općine Olovo i kojom su odredbe čl. 5, 6, 10. stavak 7., 17. i 18. stav 6. Zakona o slatkovodnom ribarstvu FBiH proglašene neustavnim, te je naloženo da se jedinice lokalne samouprave moraju uključiti po pitanju utvrđivanja politike upravljanja ovim prirodnim resursima. Ovim Zakonom se reguliše oblast slatkovodnog ribarstva – resurs koji je u podijeljenoj nadležnosti između FBiH i kantona.

V. KONSULTACIJE

Tekst Nacrta Zakona dostaviti će se svim jedinicama lokalne samouprave na području HNK, Savezu općina i gradova FBiH, Federalnom ministarstvu poljoprivrede, vodoprivrede i šumarstva. Nacrt Zakona će se objaviti na web stranici u svrhu javne rasprave.

VI. NAČIN FINANSIRANJA PROVOĐENJA ZAKONA

Za provođenje Zakona o slatkovodnom ribarstvu HNK, nisu potrebna dodatna sredstva iz Budžeta Hercegovačko – neretvanskog kantona.

